

KORINHTUQ

Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sù ngò Poluq gi, nga-nhông é gumang Timohti le kut, Korinhtuq myuq mâ é, Garai Gasâng é noqkuq hpúng lé le, Ahkaia mau gón mâ é sân-yúng bang banshoq chyáng le, dang kyô kat lhê: ² Nga-nhông é Íwa nghut é Garai Gasang eq haû Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyî sháng gaq.

Nhik tíng hkyô banshoq é Garai Gasang

³ Nga-nhông é Yhumsîng Yesuq Hkrisduq é Yhângwa eq Garai Gasang, shogyo nhikmyin hkyo é Íwa eq nhik tíng hkyô banshoq é Garai Gasang gi, hkya-on kungton é huî nyî sháng gaq. ⁴ Garai Gasâng chyáng mai ngamoq wó yû bê nghut é nhik tíng hkyo èq, hkasû é wuîhke hkyô hui bang lé le nga-nhông wó nhik tíng byi sháng gaq ga, Yhang gi, ngamoq é wuîhke hkyô banshoq má nhik tíng byî ri. ⁵ Hkâsu mù gâ le, Hkrisduq hui zô é jamjau hkyô myo myo lé ngamoq bo hui zô é su, Hkrisduq dông mai, ngamoq é nhik tíng hkyô le byíng mui nyi é nghut lhê. ⁶ Ngamoq, myit myo uhkyî é huî é nghut jáng, nungmoq é nhik tíng hkyô eq hkyi yù hkyo é matú nghut nyi ri; ngamoq, nhik tíng é

huî é nghut jáng, nungmoq é nhik títg hkyo é matú nghut luî, haû gi, ngamoq jamjaû é eq rajung za nghut é jamjau hkyô lé, myit húng é dông mai wó jân pyâm râ a-tsam, nungmoq chyáng lhoq htoq byî é nghut lhê. ⁷ Haû mù, ngamoq é jamjau hkyô pé má nungmoq bo lòm bekô nghut é su, ngamoq é nhik títg hkyô má le nungmoq bo lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wui ê, Asia mau má, wuîhke jamjaû é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó jân é a-tsam lháng htum shoq hpuzô é nghut luî, ngamoq gi, asak dui lo râ lháng a myit myoqbyu lô é nghut lhê. ⁹ Gè gè yhang, ngamoq gi, sat hui berâ nghû, ngamoq é i-myt má lumjítg pyâm é nghut lhê. Nghut kôlhang, haû gi, ngamoq gùng ngamoq a lumhkau é za, shî bê bang lé lhoq dui toq sù Garai Gasang lé lumhkaû râ matú dut é nghut lhê. ¹⁰ Garai Gasang gi, haû sù é shî râ hkyô mai hkyi yù bê nghut mù, ngamoq lé hkyi yù râ za nghut lhê. Yhang gi, ngamoq é matú nungmoq kyûdung byî nyi é u má, xoq luî ngamoq lé hkyi yù râ za nghut lhê nghû, ngamoq gi, Yhang lé myit myoqbyu to bê nghut luî, ¹¹ myo myo kyûdung byî é lé gyo byî é má ngamoq shimân jeju wó mù, byù myo myo gi, ngamoq wó é shimân jejû é yanmai Garai Gasang lé jeju hkya-on kó râ nghut lhê.

Poluq, Hen Tô É Muzó Htaî Pyâm É Lé Taî Hung É Hkyô

¹² Ngamoq nghutbûn é gi, Garai Gasâng chyáng mâ é chyoiyúng hkyô eq lhumzui hkyô má, mingkan zo wuí eq ngamoq asak duì bê hkyô lé le, je luí nungmoq eq zùm yap é hkyô lé le, ngamoq é myit sôn sê é hkyo èq, saksé hkám byî é hkyô nghut lhê. Ngamoq haú su kut é gi, mingkan hpaqchyî byéng-yá dông mai kut é a nghut é za, Garai Gasâng é jeju dông mai kut é ru nghut lhê. ¹³ Hkâsu mù gà le, ngamoq gi, nungmoq a dat nghap é eq a sê gyô é haí le a ká byî kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yù bê eq rajung za, haú Yhumsîng Yesuq é buinyì má nungmoq é hkyô lé ngamoq nghutbun râ nghut é su, ngamoq é hkyô lé nungmoq wó nghutbun râ matú, nungmoq, banshoq lé sê gyo kó râ nghut lhê.

¹⁵ Haú hkyô lé, ngò hkyak myit lum to bê nghut é yanmai, nungmoq gi, akyû í dam wó hkam yù kó sháng gaq nghû, ngò gi, nungmoq chyáng hí lé kum râ matú hen to bê nghut lhê. ¹⁶ Ngò gi, Makedoni mau shut e ló é hkyowuì má nungmoq lé hí lé kum mù, Makedoni mau mai nungmoq chyáng dum taú lò luí, Yuda mau shut e é hkyowuì má, nungmoq, ngo lé garúm kat kó râ lé myit lum to bê nghut lhê. ¹⁷ Ngò gi, haú hkyô hen é hkûn, agon za hen hkyut é nghut lhê lú? Haú a nghut jáng, ngò hen é pé gi, ra-u má za, "Nghut lhê, nghut lhê." nghû é eq, "A nghut, a nghut." ngu é wó taí râ matú, mingkan myit dông hen é nghut lhê lú?

¹⁸ Gè gè yhang, Garai Gasang gi, lhumzui sù yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" ngu

é a nghut. ¹⁹ Hkâsu mù gâ le, ngo èq le, Sila èq le, Timohti èq le, nungmoq chyáng hko kyo bê nghut é sù, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sù a nghut é za, Yhang má gi, hkâ-nhám le "Nghut lhê" nghu é za joq lhê. ²⁰ Hkâsu mù gâ le, Garai Gasang gi, danggidiq hkâ-myhó to kôle, haú pé gi, Hkrisduq má "Nghut lhê" chyat nghut lhê. Haú mù, Garai Gasâng é hpungwup shingkâng é matú, Yhâng dông mai, nga-nhúng gi, "Amen" nghû taí é nghut lhê. ²¹ Ngamoq eq nungmoq lé Hkrisduq má yap gingtíng nhang é sù gi, Garai Gasang nghut ri. Yhang gi, nga-nhúng lé masat é xû but byi mù, ²² Yhang sing lhê gâ é dizik, nga-nhúng lé htùng tap byi luí, jé lô râ hkyô pé hkyak joq lhê nghu é masat zè dông, Yhâng é Woi-nyí lé nga-nhúng é i-myt unghkaú má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ dông Garai Gasang lé wut dúng lhê. ²⁴ Haú gi, nungmoq é lumjíng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chôm zui saí é ru nghut lhê; haí mù gâ le, lumjíng myit mai za nungmoq wó yap gíng nyi bùm kô é ru nghut lhê.

2

¹ Haú mù luí, ngò gi, nungmoq lé myit nò nhâng é dut râ dông, lé dum kúm é a kut râ nghû, myit hpyit to bê nghut lhê. ² Hkâsu mù gâ le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lúh? ³ Ngò jé lé é hkûn, ngo lé gabú

nhâng râ âng é bâng èq, ngo lé myit nò nhang é a hui sháng gaq nghû, ngò gi, ngò kut é eq rajung za laiká kâ kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghû, nungmoq banshoq bang lé ngò hkyak myit lum tô lhê. ⁴ Hkâsu mù gâ le, ngò gi, nungmoq lé laiká kâ é hkûn, myit myo uhkyí mó èq le, myit má yón kuq é èq le, ngaubyi ngau-nhap é èq le, kâ kat bê nghut lhê. Haú gi, nungmoq lé yón kuq é hui nhâng râ matú a nghut é za, nungmoq lé ngò hkâ-í chytidap é hkyô lé sé nhâng râ matú ru nghut lhê.

Mara Hkyut Byî Lhum Râ Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luî, ngò gyai wá yhang zuq zuq a taí nau é nghut lhê. ⁶ Nungmoq myo hpyâng èq yhang lé mara dam byî é hkyô gi, yhâng é matú gé bê nghut ri. ⁷ Nghut kôlhang, ahkuî, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tíng byi keq. ⁸ Haú mù luî, nungmoq é chytidap myit gi, yhang é ahtoq má dum lhoq gíng shít nyí keq nghû, nungmoq lé ngò wum taí tsuq kat lhê. ⁹ Ngò, nungmoq lé haí mù laiká ká byî kat é hkyô gi, nungmoq chyam wú huí é hkyô lé wó jân é hkyô eq jung hkangmó má jìno gyo hkyô bò a bo é lé, wó sé râ matú le nghut lhê. ¹⁰ Nungmoq, rayuq yuq lé mara hkyut byî é nghut le gi, ngò le, haú yuq lé mara hkyut byî lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é

yanmai, Hkrisduq é myoq hí má ngò mara hkyut byi bê nghut lhê. ¹¹ Hkâsu mù gâ le, Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo râ matú, Troa myuq má ê jé é hkûn, haû Yhumsîng gi, ngo lé hkum hpóng byî é lé, ngò myang ri. ¹³ Nghut kôlhang, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luî, Makedoni mau shut xoq e ló é nghut lhê.

¹⁴ Nghut kôlhang, Hkrisduq má, ngamoq lé hkâ-nhám le ûng budang hkyô shut shuí-û yù mù, Hkrisduq lé sê é sumsé hpaqchyi é nam ngón shôm lé, ngamoq dông mai jowò hkangmó má taî pyo é sù, Garai Gasang gi, jeju hkya-ôn é huî nyi sháng gaq. ¹⁵ Hkâsu mù gâ le, ngamoq gi, hkyi yu é huî nyi bâng chyáng le, htên byoq ló é huî nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shî-nò hkyo é shôm dut mù, hkyi yù huî nyi bâng é matú nghut jáng, asak hkyo é nam ngón shôm dut é nghut lhê. Haû mù, ó yuq wá muzó shî eq htuk râ lú? ¹⁷ Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé dông lhumzui myit mai taî é nghut lhê.

3

¹ Ngamoq gi, yhumsing gùng yhumsîng dum

owaq hi ló é nghut lhê lhu? Byù ra-am kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ² Nungmoq gùng yhang gi, ngamoq é myit nhiklhum má kâ tô é, yuq hkangmó èq nghap lui sê yu é laiká gùng pé nghut akô. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng mâ é laiká nghut kô é hkyô lé shit nyi akô. Haû gi, kâ jung chî èq kâ tô é đông a nghut é za, rû dui nyi é Garai Gasâng é Woi-nyí èq kâ tô é nghut é htoq agó, luqlong pé má kâ tô é đông a nghut é za, xângzo byu é myit nhiklhum long pé má kâ tô é ru nghut lhê.

⁴ Haû su nghû hkyak wó myit lum é hkyô gi, Garai Gasâng é hí má, Hkrisduq đông mai ngamoq wó yu é nghut lhê. ⁵ Ngamoq gi, yhumsing gùng haí lé le wó kut lhê nghu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haû gi, tarâ laiká mai lo é a nghut é za, Woi-nyí mai lo é ru nghut lhê. Hkâsu mù gâ le, laiká gi, shî dâm byi lhê, Woi-nyí kúm gi, asak byí é nghut lhê.

Dangshikaq Asik É Hpungwup Shingkang

⁷ Ahkuí, haû Mosheq é myoqdong mâ é hpungwup shingkang é yanmai, haû Israelaq byu pé gi, yhâng é myoqdong lé a wó wú tsuq to kó nghut ri. Hpungwup shingkang haû shûm lo byuq sê é nghut kôlhang, luqlong má dok kâ tô é, shî-nò hkyô lhoq htoq é tarâ muzó gi, hpungwup shingkang eq rahá jé lé é nghut lhê. ⁸ Haû su nghut jáng,

haû Woi-nyí é muzó gi, hpungwup shingkang je riyhang dut râ a nghut kó lhú? ⁹ Gè gè yhang, haû byù lé mara byí é tarâ muzó lháng, hpungwup shingkang bo é nghut le gi, dingmán nhang é hkyô sik gi, je riyhang hpungwup shingkang bo é nghut lhê ô! ¹⁰ Hkâsu mù gâ le, hpungwup shingkang bo é tarâ muzó gi, hpungwup shingkang je bo é dangshikaq asik eq whuí é hkûn, hpungwup shingkang a bò lo dut byuq bê nghut ri. ¹¹ Shum byuq ló é tarâ lháng gi, hpungwup shingkang eq rahá lé jé bê nghut le gi, ru gîng nyí é dangshikaq asik é hpungwup shingkang gi, je riyhang gyaú râ nghut lhê ô!

¹² Haû mù luí, ngamoq gi, haû sù é myoqbyù hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shûm byuq ló é hkûn, haû Israelaq byu pé haú lé a wú tsuq râ matú, yhâng é myoqdong lé myoqgo èq nghop pyâm é sù nghut ri. ¹⁴ Nghut kôlhang, yhangmoq é myit gi, lhoq chut byí é hui bekô nghut ri; hkâsu mù gâ le, hkû-nyí jé shoq, dangshikaq axau lé nghap é hkûn, rajung zâ é myoqgò gi, ru nghop to byí ashí nghut ri. Haû gi, huí sêng pyâm é a hui shi, haí mù gâ le, Hkrisduq dông za haû lé wó yu pyâm é nghut lhê. ¹⁵ Hkû-nyí jé shoq lháng, Mosheq é laiká lé nghap é hkûn, yhangmoq é myit nhikhum má myoqgò èq nghop tô é nghut ri. ¹⁶ Nghut kôlhang, ó yuq le, Yhumsîng chyáng hká u lhîng lò kôlhang, haú hkûn jáng, myoqgò gi, hí pyám byí é hui râ nghut lhê. ¹⁷ Yhumsîng gi, haû Woi-nyí nghut mù, Yhumsing é Woi-nyí nyí é jowò má, luthkyô le joq

lhê. ¹⁸ Haû Yhumsîng é hpungwup shingkang lé lhoq htoq shit é bang banshoq nghut é myoqdong má myoqgò a nghop é bang nga-nhúng gi, ru myo jat nyi é hpungwup shingkang lhoq htoq byi hkyô nghut é, Yhâng é isâm shut htaî lhik wang é huî nyi bê nghut lhê. Haû hkyô gi, haû Woi-nyí nghut sù Yhumsîng chyáng mai lo é nghut lhê.

4

Tseyam Pé Má Bo É Sutzè

¹ Ngamoq gi, Garai Gasâng jeju mai muzó hkyô haû wó é nghut mù, myit wum a gyui é nghut lhê. ² Ngamoq gi, zaú tô é eq hoq htoq é hkyô pé lé tô pyám lui, mhaú zô é hkyô le a kut, Garai Gasâng é mungdang lé le ahpuq alhik a kut é bang nghut lhê. Haû su kut râ malaî, ngamoq gi, haû tengmán hkyô lé san za lhoq htoq shit é dông, Garai Gasâng é hí má yuq hkgámó é myit sôn sê é hkyô má, yhumsing gùng yhumsîng htuk shoq nyi lhê. ³ Ngamoq é gabú danglù gi, myoqgo eq nghop pyâm é huî é nghut jáng, haû gi, htên byoq nyi bâng chyáng za nghop pyám huî é ru nghut lhê. ⁴ Haû Garai Gasâng é azòng isâm nghut sù, Hkrisduq é hpungwup shingkang bo é gabú danglu é maubó lé, a lumjîng bang a wó myâng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haû nghut é yanmai, ngamoq gi, yhumsing gùng eq séng lui hko kyô é a nghut é za, Yesuq Hkrisduq gi, Yhumsîng nghut é hkyô lé le, Yesuq é matú, ngamoq gùng yhang gi, nungmoq

* **4:4** Ipyat shi é garai gâ é gi, Tsadán lé gâ é nghut lhê.

é jùn pé nghut é hkyô lé le, hko kyô é ru nghut lhê! ⁶ Hkâsu mù gâ le, "Mauchut hkaû mai maubó htoq lô sháng gaq."* ga taî é Garai Gasang gi, Yesuq Hkrisduq é myoqdong mâ é Garai Gasâng é hpungwup shingkâng é maubó lé sê gyô é nyan lé, nga-nhúng lé byî é dông, Yhâng é maubó lé, nga-nhúng é i-myit unghkaû má duqbó nhâng bê nghut ri.

⁷ Nghut kôlhang, ngamoq gi, sutzè haû bo é tseyam pé† nghut nyi lhê. Haû gi, gyaú dik é a-tsam mó gi, ngamoq chyáng mâ é a nghut é za Garai Gasâng chyáng mâ é nghut é hkyô lé tân shit râ matú nghut lhê. ⁸ Ngamoq gi, wuîhke hkyo èq lhíngkyuq mai gyai yhang nhê zik é hui kôlhang, a gyop byuq é nghut lhê; myit lhoq nhúng pyâm é hui kôlhang, myit a htâm byuq é nghut lhê; ⁹ zing-rî é hui kôlhang, kâng pyám huí é a nghut; bat lhêng pyâm é hui kôlhang, htên byoq huí é a nghut. ¹⁰ Haû Yesuq é asak duì hkyô le, ngamoq é gungdu má lhoq htoq shit é hui sháng gaq nghû, ngamoq gi, Yesuq shi é hkyô lé, hkâ-nhám le, ngamoq é gungdu má wùn waq wún é nghut lhê. ¹¹ Hkâsu mù gâ le, Yesuq é asak duì hkyô gi, nga-nhúng é shî sê é gungdu má lhoq htoq shit é hui sháng gaq nghû, asak dui nyi é bang ngamoq gi, Yesuq é matú é yanmai, hkâ-nhám le, shi byuq hkyô shut ap pyâm é huí nyi ri. ¹² Haû mù luí, shi byuq hkyô gi, ngamoq má mù zuí nyi ri; asak duì hkyô kúm gi, nungmoq má mù zuí nyi é nghut ri.

¹³ "Ngò gi, lumjínng bê nghut lhê, haû mù, ngò

* **4:6** Apûn 1:3 † **4:7** Tseyam pé gâ é gi, nga-nhúng é wum nyhôm é gungdu lé gâ é nghut lhê.

taí é nghut lhê."✧ ga kê tô é eq rajung za, ngamoq le, lumjǐng hkyô hau èq yhang, lumjǐng bê nghut mù taí é nghut lhê. ¹⁴ Haí mù gà le, haú Yhumsǐng Yesuq lé shi é mai lhoq dui toq é Sû gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuî jé rǎ nghut é lé, ngamoq sê lhê. ¹⁵ Haú jeju wó é byu pé gi, je riyhang myô jat lò mù, Garai Gasâng é hpungwup shingkâng é matú, jeju hkya-ôn é hkyô gi, byǐng mui nyi sháng gaq ga, haú pé banshoq gi, nungmoq é akyu é matú nghut nyi ri.

¹⁶ Haú mù luî, ngamoq gi, myit wum a gyuî é nghut lhê. Ngamoq é shinggan gungdu gi, htên byoq ló nyi kôhang, i-myt unghkaú gi, ra-nyí eq ra-nyí asik dut nhang é huí nyi ri. ¹⁷ Hkâsu mù gà le, ngamoq é tiq é eq razup zâ é wuîhke hkyô pé gi, ngamoq é matú haú pê htoq gyai hkik é ahtum abyuq é hpungwup shingkang lé, wó yû nhang ri. ¹⁸ Haú mù, nga-nhûng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gà le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhkûng Htoq Mã É Yhûm

¹ Haú myidàm zúm nghut é nga-nhúng lúng nyi é gungdu gi, htên byoq sê é nghut kôhang, byu loq èq saí é a nghut é za, mauhkûng htoq má joq é ahtum

✧ 4:13 Hkya-on 116:10

abyuq é yhûm* nghut é, Garai Gasâng chyáng mâ é yhûm lé, nga-nhúng wó é hkyô lé, nga-nhúng sê lhê. ² Nghut kôlhang, ahkuî, nga-nhúng gi, nga-nhúng é mauhkûng yhûm lé tû hut byî é lé gyai yhang hui naû mù, nò-kying su kyîng nyi lhê. ³ Haî mù gâ le, nga-nhúng gi, hut byî é hui jáng, gungdu a bò bang a dut lo râ nghut lhê. ⁴ Hkâsu mù gâ le, nga-nhúng gi, zúm shî má lúng nyi é u lé, wôlai wùn mù, nò-kying su kyîng nyi lhê; haû gi, shî byuq sê é lé, asak dui é èq wó htaî lhik pyám sháng gaq nghû, nga-nhúng gi, a hut byî é hui râ lé a ô nau é za, nga-nhúng é mauhkûng yhûm lé tû hut byî é hui râ lé ô nau é yanmai nghut lhê. ⁵ Ahkuî kúm, jeju haû hkam yù râ matú, nga-nhúng lé lajâng to byî é sù gi, Garai Gasang nghut mù, jé lô râ hkyô gi, hkyak joq lhê nghû é masat zè dông, nga-nhúng lé haû Woi-nyí byi bê nghut ri.

⁶ Haû mù luî, ngamoq gi, hkâ-nhám le hkyak lum tô lhê. Gungdu shî má yhûm dông ru lúng nyi nyi gi, haû Yhumsîng eq wê gâng nyi ashî nghut é lé ngamoq sê nyi lhê. ⁷ Ngamoq gi, byu-myang é dông mai a nghut é za, lumjîng myit mai asak dui é ru nghut lhê. ⁸ Ngamoq gi, hkyak myit lum tô lhê nghû, ngò taî lhê, haû mù, gungdu shî mai wê gang luî, haû Yhumsîng eq rahá nyi râ lé ngamoq je riyhang ô nau é nghut lhê. ⁹ Haû mù, ngamoq gi, gungdu shî má yhûm dông lúng nyi é nghut nghut, haû mai wê gâng é nghut nghut, ngamoq myit myoqbyu tô é jowò gi, Yhang lé gabú nhâng râ matú nghut lhê. ¹⁰ Hkâsu mù gâ le, yuq

* **5:1** Mauhkûng htoq má joq é ahtum abyuq é yhûm gâ é gi, nga-nhúng, mauhkûng mingdán má jé é hkûn wó râ gungdu asik lé gâ é nghut lhê.

hkanmó gi, gungdu shî má yhûm đông lúng nyi é u lé, ge é nghut nghut, a ge é nghut nghut, kut é eq rajung za hkam yù râ matú, Hkrisduq é tarâ jéyáng tanghkuq hí má, nga-nhúng banshoq bang htoq shit ra râ nghut lhê.

Nguingón Hkyô Xoq É Muzó

¹¹ Haû mù, Yhumsing lé gyuq hkungga râ hkyô haî nghut é lé ngamoq sê é nghut luî, ngamoq gi, byu pé lé taî pûn kyîng shikut lhê. Ngamoq haî nghut é gi, Garai Gasâng chyáng san za nghut nyî mù, nungmoq é myit sôn sê é hkyô má le san za nghut râ lé, ngò myit lum lhê. ¹² Haû myit nhiklum má bo é lé gumrông râ malaî, byu-myang é lé gumrong é bang lé, nungmoq wó tû taî kó sháng gaq nghû, ngamoq gi, nungmoq chyáng yhumsing gùng lé dum owaq shikut é a nghut é za, ngamoq é hkyô lé, nungmoq wó gumrông râ ahkáng, nungmoq lé byî é ru nghut lhê. ¹³ Ngamoq a gyîng é đông nghut le gi, Garai Gasâng é matú a gyîng é nghut lhê; ngamoq gyîng é đông nghut le gi, nungmoq é matú gyîng é nghut lhê. ¹⁴ Hkâsu mù gâ le, Hkrisduq é chyitdap myit èq ngamoq lé kut nhang nyi é nghut lhê. Haû gi, banshoq bâng é matú rayuq shî hkám byi bê nghut mù, banshoq bang shi é đông nghut bê nghû, ngamoq hkyak sê gyô é yanmai nghut lhê. ¹⁵ Yhang gi, asak dui nyi é bang, yhangmoq yhumsing gung é matú a duì lô é za, yhangmoq é matú shî hkám byi luî, lhoq dui toq é huí Su é matú duì kó sháng gaq ga, banshoq bâng é matú shî hkám byi bê nghut ri.

¹⁶ Haû mù, ngamoq gi, ahkuî mai, ó yuq eq séng luî le, mingkan hkyam đông mai a wú lô é nghut

lhê. Ngamoq gi, hí hkûn Hkrisduq lé haú dông wú é nghut kôhang, haú su hkâ-nhám le a kut lô é nghut lhê. ¹⁷ Haú nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sù dut bê nghut ri; haú axau gi, byuq byuq mù, lhunglháng asik dut bu-nhung! ¹⁸ Haú pé banshoq gi, Garai Gasâng chyáng mâ é chyat nghut lhê. Yhang gi, Hkrisduq dông mai nga-nhúng lé Yhânggùng eq nuingón hkyô xoq yú luí, nuingón hkyô xoq é muzó ngamoq lé byi bê nghut ri. ¹⁹ Haú gi, Garai Gasang gi, byu pé é mara lé a matsíng byí é za, Hkrisduq dông mingkan lé Yhânggùng eq nuingón hkyô xoq yú bê nghut luí, Yhang gi, nuingón hkyô xoq yu é mungdang haú lé, ngamoq lé ap byí to bê nghú nau é nghut lhê. ²⁰ Haú mù luí, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pûn kyíng nyi é nghut lhê. Garai Gasang eq nuingón hkyô xoq yú keq nghú, ngamoq gi, Hkrisduq é gunglik dông nungmoq lé dúng tôngbán nyi lhê. ²¹ Nga-nhúng gi, Hkrisduq dông mai Garai Gasâng é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasâng é mù zui byinzùm wù nghut nyi é eq rajung za, Garai Gasâng jeju lé akyú a bo é dông hkâhap yú kó nghú, nungmoq lé wum taí tsuq kat lhê. ² Hkâsu mù gâ le, "Ngò ô nau é ahkyíng má, nang lé ngò gyo byi bê nghut mù, hkyi yú hui râ buinyi má, nang

lé ngò garúm bê nghut lhê."☆
ga luî, Yhang taî ri. Ngò, nungmoq lé taî kyo kôlé,
ahkuî gi, Garai Gasang ô nau é ahkyíng, ahkuî gi,
hkyi yu é buinyì nghut ri.

Poluq É Wuîhke Hkyô Pé

³ Ngamoq é hpungmû gi, taî hpoî pyâm é a hui sháng gaq nghû, ngamoq gi, ó yuq é hkyô má le, leqbat jung a to byî é nghut lhê. ⁴ Haû kut râ malaî, ngamoq gi, Garai Gasâng é dui-nhâng zoshâng wuî nghut é hkyô lé, hkyô hkangmó má yhumsing gùng yhumsîng shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyí hkyô pé má le shit nyi lhê. ⁵ Nhuq bat huî é pé má le, htóng lhúng huî é eq toq gabyông é má htîm é huî é má le, mù zui shikut é má le, a myang yhup é myín pé má le, zòmut huî é má le, shit nyi lhê. ⁶ Sâ-n-yúng é má le, sê gyô é hkyô má le, myit hing é eq myit ge é má le, Chyoiyúng Woi-nyí eq chyitdap myit akying má le, ⁷ tengmán é mungdang hko é má le, Garai Gasâng é a-tsam má le, loqyò loqpai má dingmán hkyô nghû é laknak pé dông le, shit nyi lhê. ⁸ Hpungwup shing kang byî é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang taî kôle, shit nyi lhê. Ngamoq gi, tengmán kôhang, mhaú zo bang dông sôn yu akô nghut ri. ⁹ Ngamoq lé sé kôhang, a sê é dông kut akô nghut ri; shi lô nyí kôhang, rû dui nyi é bang nghut lhê; nhuq bat é hui kôhang, sat pyâm é a hui shî é bang nghut lhê. ¹⁰ Yón hkyô byíng nhâng kôhang, hkâ-nhám le gabú nyi lhê; myùng kôhang, byù myo myo lé wó sùt

☆ 6:2 Esai 49:8

nhang nyi lâhê; haî le a wó kôlhang, jung hkgangmó lé sing é dông nghut lâhê.

¹¹ Korinhtuq bang ê, ngamoq gi, nungmoq lé san za taí bê nghut luî, ngamoq é myit nhiklhum lé, nungmoq é matú làm shoq hpông to byi bê nghut lâhê. ¹² Ngamoq gi, ngamoq é chytđap myit lé, nungmoq chyáng mai lăng taû yu nyi é a nghut, nungmoq sheq, ngamoq chyáng mai lăng taû yu nyi kô é ru nghut lâhê. ¹³ Nungmoq le, myit nhiklhum lé làm shoq dum taû hpông keq nghû, ngò gi, ngá zô pé lé dông taî lâhê.

A Lumjîng Bang Eq A Nhungkut Râ Hkyô

¹⁴ A lumjîng bang eq rahá kandang hkâwaq kó. Hkâsu mù gâ le, dingmán é hkyô eq agè ashop é hkyô gi, haî sêng lhum lâhê l hú? Maubó eq mauchut gi, hkâsu wó zùm yap kó râ l hú? ¹⁵ Hkrisduq eq Beliala* gi, hkâsu kut myit wó huî lhum kó râ l hú? Lumjîng sũ rayuq eq a lumjîng sũ gi, hkâsu wó pung lhum kó râ l hú? ¹⁶ Garai Gasâng é noqkuq yhũm eq hparà lhô pé gi, hkâsu wó hũm râ l hú? Hkâsu mù gâ le, nga-nhũng gi, rũ dui nyi é Garai Gasâng é noqkuq yhũm nghut lâhê. Haû gi, "Ngò gi, yhangmoq eq rahá nyi mù, yhangmoq chyáng sô nyi râ nghut luî, Ngò gi, yhangmoq é Garai Gasang dut mù, yhangmoq gi, Ngá é byu pé dut kó râ nghut lâhê." ✧ ga Garai Gasang taî tô é eq rajung za nghut ri.

¹⁷ "Haû mù luî, yhangmoq chyáng mai htoq lô mù, gotũ san za nyi keq. A sansêng é zè

* **6:15** Beliala gâ é gi, Tsadán é myìng rajà nghut lâhê. ✧ **6:16** Nhung 26:12; Yer 32:38; Ezk 37:27

lé hkâzáng kó, haú hkûn, Ngò, nungmoq lé
lhom hap yù râ nghut lhê."[✧]
ga haú Yhumsing taí ri.

¹⁸ "Ngò gi, nungmoq é Îwa dut mù, nungmoq gi,
Ngá é byizo yuqzô pé dut kó râ nghut lhê."[✧]
ga haú wum-o a-tsam dik shoq bò Sû Yhumsing taí
ri.

7

¹ Chyitdap é luzúm wuì ê, nga-nhúng gi, dang-
gidiq haú pé lé wó tô é bang nghut é yanmai,
gungdu eq woi-nyí lé agot a-û dut nhang é jung
hkgámó mai, yhumsing gùng yhumsing lhoq sân-
yúng yû luí, Garai Gasang lé gyuq hkunggâ é myit
èq chyoiyúng hkyô má lhoq gumjup yu nyi sháng.

Poluq É Gabú Hkyô

² Nungmoq é i-myt unghkaú má ngamoq lé
jowò byi keq. Ngamoq gi, ó yuq lé le a shut wú,
ó yuq lé le a lhoq htên wú, ó yuq lé le a mhaú
zô wú é nghut lhê. ³ Ngò gi, nungmoq lé mara
byi râ matú haú su taí é a nghut. Ngamoq gi,
asak duì kôle, shí kôle, nungmoq eq rahá wó dut
shoq, nungmoq gi, ngamoq é i-myt unghkaú má
lúng nyi é nghut lhê nghû, hí hkûn ngò taí wú bê
nghut lhê. ⁴ Ngò gi, nungmoq lé, hkyak yhang myit
lum to bê nghut lhê. Ngò gi, nungmoq é yanmai
gyai yhang gumrong nyi lhê. Ngò gi, myit wum
byí é gyai yhang huí ri; jamjau hkyô pé myo myo
ngamoq hui kôlhang, ngò, gyai yhang gabú nyi lhê.

⁵ Hkâsu mù gâ le, ngamoq gi, Makedoni mau
má jé é hkûn, ngamoq é gungdu gi, zim za a

✧ **6:17** Esai 52:11; Ezk 20:34,41 ✧ **6:18** 2 Sam 7:14

myang nyi é htoq agó, hkyô hkangmó má ngamoq wuîhke jamjau hui zô é nghut lhê. Shinggan má gi, mabyoq htoq, ahkaû má gi, gyuq kyum nyi é nghut lhê. ⁶ Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é đông mai, ngamoq lé nhik tîng byi bê nghut ri. ⁷ Yhang jé lé é đông mai za a nghut, yhang lé nungmoq nhik tîng byi é hkyô đông mai le nghut lhê. Ngá é gabú hkyô gi, gó nám lhê htoq má je myo sháng gaq ga, yhang gi, nungmoq ngo lé myit tuî nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byi é hkyô pé lé, ngamoq lé tai kyo bê nghut ri.

⁸ Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹ Nghut kôlhang, ngò gi, ahkuî gabú lhê; haû gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lîng nhang é yanmai ru nghut lhê. Nungmoq gi, Garai Gasang ô nau é đông yón huî é bang dut bekô nghut mù, nungmoq lé, ngamoq èq hai akyû le a lhoq yôm byi é nghut lhê. ¹⁰ Hkâsu mù gâ le, Garai o é đông yón kuq huî é hkyô gi, nungngham wó hkyô a bo é za, hkyi yù hkyô wó shoq, myit lîng nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹ Garai o é đông, nungmoq chyáng akyû lhoq htoq byi é yón kuq hkyô lé wú wú keq! Haû gi, gyai yhang myit zuq é hkyô, yhumsing gùng mara a bo é lé tûn shit râ lé myit ngui é hkyô, nhikmo-yo é hkyô, gyuq

dan é hkyô, myit ô nau nyi é hkyô, myit chiq byî é hkyô, tengmán hkyô kut râ rì rì nghut é hkyô pé nghut lhê. Nungmoq gi, haú hkyô má mara a bo é lé hkat hkanmó má saksé tân shit bekô nghut ri. ¹² Haú mù luî, ngò, nungmoq lé kê kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nong byî é hkyô lé, Garai Gasang hí má nungmoq gung nungmoq wó myang râ matú kê kat é sheq ru nghut lhê. ¹³ Haú pé banshoq dông mai, ngamoq gi, myit wum byî é huî ri.

Ngamoq myit wum byi huî é htoq agó, Tituq hkâ-í yhang gabú é lé myang mù, ngamoq gi, je riyhang myit gabú é nghut lhê. Haî mù yhang gabú é gâ lé, nungmoq banshoq bang eq yhang é myit lé lhoq nguingón byi kê é yanmai nghut ri. ¹⁴ Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpû é nghut lhê. Nungmoq lé ngamoq taî é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵ Nungmoq banshoq bang jino gyo kômù, gyuq nán é myit mai yhang lé lhom hap yù kê é lé, yhang myitbún é hkûn, yhang nungmoq lé chyitdap é myit gi, je riyhang kê dik nyi ri. ¹⁶ Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byî É Hkyô

¹ Gumang wui ê, ahkuî, ngamoq gi, Makedoni mau mâ é noqkuq hpûng pé lé Garai Gasang byî

é jeju eq sêng é hkyô, nungmoq lé sé nhâng nau ri. ² Yhangmoq gi, wuîhke jamjau hkyô myo myô èq chyam lik é huí é nghut kôlhang, yhangmoq é a ung taí loshoq gabú é hkyô eq yhangmoq é gyai yhang myung é hkyô gi, agùn agó byí nau é myit bò nhang ri. ³ Hkâsu mù gâ le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lháng byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri. ⁴ Yhangmoq gi, haû sân-yúng bang lé wó bo dojaú râ matú, ngamoq lé gyai yhang ahkáng dung kô é nghut ri. ⁵ Yhangmoq gi, ngamoq myit ngam tô é htoq má lháng lai shoq, Garai Gasang ô nau é hkyô lé châng é đông, yhangmoq gùng lé hí haû Yhumsîng lé ap byí pyám kômù, hau htâng sheq ngamoq lé ap kô é nghut ri. ⁶ Haû mù luí, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq byíng jup byi râ matú, yhang lé wum byi bê nghut lhê. ⁷ Nungmoq gi, lumjîng myit má, dang nyo é hkyô má le, sumsé hpaqchyî hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byí nau é jeju shî má le agùn agó dut râ lé, bûn nyi keq.

⁸ Ngò gi, nungmoq lé hkunmó hkyô é a nghut, nghut kôlhang, góbâng é myit zuq é hkyô eq whuí wú é đông, nungmoq é chyitdap myit jet é hkyô lé chyam wú naû luí sheq ru nghut lhê. ⁹ Hkâsu mù gâ le, nungmoq gi, nga-nhûng é Yhumsîng Yesuq Hkrisduq é jeju lé sê akô nghut ri. Yhang gi, Yhâng

é myùng hkyô dông mai nungmoq wó bang dut kó sháng gaq ga, jung hkgangmó wó sù nghut kôhang, nungmoq é matû é yanmai, myùng sù dut bê nghut ri.

¹⁰ Shí hkyô eq sêng é má, nungmoq é matú ge dik é hkyô ngò hpaqchyî byi kôlé: A-nhik, nungmoq gi, sâng-hi, byî hî kô é za a nghut, haû su kut nau é myit bo é bang le nghut akô. ¹¹ Nungmoq wó dut é eq rajung za, haû lé lhoq pân é dông nungmoq é gyai yhang kâm kut é myit lé wó lhoq dik ko sháng gaq, ahkuî, muzó haû lhoq pán keq. ¹² Hkâsu mù gâ le, byí nau é myit bo é nghut jáng, chyunghuq haû gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wôlai dut, góbang gi, hkyamsâ nyî râ lé, ngamoq ô nau é a nghut, rawuí za wó dut kó râ lé sheq ô nau é ru nghut lhê.

¹⁴ Nungmoq haî râ tô é lé, yhangmoq agùn agó wó é mâ é wó dum taû htuqbang byi kó sháng gaq, ahkui lhê é ahkyíng má, yhangmoq haî râ tô é lé, nungmoq agùn agó wó é mâ é htuqbang byi keq. Haû jáng sheq, wuí wuí za wó dut kó râ nghut lhê.

¹⁵ Haû gi, "Myo myo tsíng yu é sù gi, lûm myo shoq wó é a nghut, shau za tsíng yu é sù gi, lûm shau shoq wó é a nghut."✧ ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byî é eq rajung zâ é myit lé, Tituq é i-myit má kat byî é Garai Gasang lé, ngò jeju hkya-ôn lhê. ¹⁷ Hkâsu mù gâ

le, Tituq gi, ngamoq dŭng tŏngbán é lé za lhom hap yu é a nghut, gyai yhang myit toq mù, yhânggùng yhang myit hpyit yŭ luí, nungmoq chyáng lé lô gù za nghut ri. ¹⁸ Ngamoq gi, haũ gabú danglù lé dojaũ é má noqkuq hpŭng pé banshoq èq hkyanon huí é gumang hpó haũ lé le, yhang eq rahá nhang kat lhê. ¹⁹ Hau htoq agó, ngamoq garúm râ myit bo nyi é hkyô lé tŭn shit mù, haũ Yhumsŭng lé hkungga râ matú ngamoq wú gŏn nyi hkyô nghut é, alu lé ngamoq yu chung é hkŭn, ngamoq é byinzùm kut râ matú, noqkuq hpŭng pé èq hkyin yu é sŭ le yhang nghut lhê. ²⁰ Ngamoq gi, myit lŏm luí byí é chyunghuq shí lé ngamoq wú gŏn nyi é hkyô má, ó yuq èq le mara hô râ hkyô a htoq shoq sidiq nyi lhê. ²¹ Hkâsu mù gâ le, jô é hkyô kut râ matú ngamoq shikut nyi é gi, haũ Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shit é sŭ, ngamoq é gotŭ gumang hpó lé le yhangnhik eq rahá nhang kat lhê. Yhang gi, ahkuí lháng, nungmoq lé gyai yhang myit lum tŏ é yanmai, shirŏng myit je riyhang bo nyi ri. ²³ Tituq é hkyô ga jáng, yhang gi, ngá é zùm yap luzúm eq ngò eq rahá nungmoq chyáng mù zui sŭ nghut ri. Nga-nhŭng é gumâng nhik é hkyô ga jáng, yhangnhik gi, noqkuq hpŭng pé é gunglik eq Hkrisduq é arŏng nghut akô. ²⁴ Haũ mù luí, haũ noqkuq hpŭng pé wó myâng kó sháng gaq, nungmoq má ngamoq haĩ mù gumrong é hkyô eq nungmoq é chyitdap myit é saksé lé, haũ bang lé

tûn shit keq.

9

¹ Ngò gi, haû sân-yúng bang lé htuqbang râ hkyô eq séng luî, nungmoq lé kê kat râ a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haû mù, ngò gi, Makedoni mau bang lé, haû hkyô eq séng luî gumrong kyo mù, a-nhik mai yhang, Ahkaia mau má nungmoq byi râ rì rì nghut bê hkyô lé, yhangmoq lé taî kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaû toq byi bê nghut ri. ³ Nghut kôlhang, shí hkyô má nungmoq eq séng luî ngamoq gumrong é gi, hká dông le dangsôm a dut byuq sháng gaq, ngò taî bê eq rajung za nungmoq rì rì wó hen to râ matú, ngò gi, gumang wuî lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq rì rì a hen tô é lé, lé myang ang kê é nghut jáng, nungmoq za hoq hpu râ a nghut, ngamoq le, nungmoq lé lûm yhang lum pyâm é yanmai, hoq bo hpu râ nghut lhê. ⁵ Haû mù luî, nungmoq danggidiq byî to bê nghut é, chyunghuq lé rago wó lajâng pân to râ matú, gumang wuî lé wum taî tsuq mù, nungmoq lé hí, lé kum nhâng râ gi, ra yhang râ lhê nghû ngò wó myit ri. Haû hkûn sheq, a nau é dông byî é a nghut é za, byí nau é chyunghuq dông hen tô é dut râ nghut lhê.

Agùn Agó Byî É Hkyô

⁶ Shau za sân hkyó sù gi, shau za shû yù râ nghut mù, agùn agó sân hkyó sù gi, agùn agó shû yù râ

nghut lhê gâ é dang lé, myitbûn nyi keq. ⁷ Yuq hkanmó gi, a kâm byi é eq byi nhang é đông a nghut é za, yhumsing myit má byi nau é myhó lé myit hpyit yû mù byi é đông dut râ lhê. Hkâsu mù gâ le, Garai Gasang gi, gabú myit eq byi sù lé chyitdap ri. ⁸ Haû mù, ahkyíng hkanmó jung hkanmó má, nungmoq râ é banshoq wó mù, ge é muzó hkanmó lé nungmoq je myo wó kut kó sháng gaq ga, Garai Gasang gi, jeju lhunglhang lé, nungmoq lé wó byi é sù nghut lhê. ⁹ Haû gi, "Yhang gi, a ha bûn é za myùng bang lé yhang é chyunghuq tsing gàm byi bê nghut ri; Yhang é dingmán hkyô gi, ahtum abyuq gíng nyi ri."☆

ga kâ to eq rajung za nghut ri. ¹⁰ Kyô hkyó sù lé kyôshi, zoshuq matú muk byi é Sù gi, nungmoq lé kyôshi byi mù, lhoq myô jat byi râ eq, nungmoq é dingmán hkyo é ashi lé myô lò nhâng râ nghut lhê. ¹¹ Nungmoq gi, ayoq abun hkanmó má agùn agó byi é bang wó dut kó râ matú, hkyô hkanmó má sùt wó é bang dut é hui kó râ nghut lhê. Nungmoq agùn agó byi é hkyô lé, ngamoq hai byi mù, Garai Gasang lé jeju hkya-ôn é hkyô dut râ nghut lhê.

¹² Nungmoq dojaú é hkyô shi gi, Garai Gasang é byu pé râ é hkyô lé lajang byi é za a nghut, Garai Gasang lé jeju bûn é dang byíng mui nyi nhang é le nghut lhê. ¹³ Dojaú hkyô hau é yanmai, nungmoq lhumzui hkyô saksé tún shit bekô nghut mù, byu pé gi, Hkrisduq é gabú danglù lé nungmoq yín yû lú jino gyo kô é yanmai le, yhangmoq eq yuq hkanmó lé, nungmoq é a ha bûn é myit mai shuí

☆ 9:9 Hkya-on 112:9

gam chûng kô é yanmai le, Garai Gasang lé hkya-on kó râ nghut lhê. ¹⁴ Hau htoq agó, Garai Gasang gi, nungmoq lé jeju lai shoq byî tô é yanmai nungmoq é matú yhangmoq kyûdung byî é u má, yhangmoq é myit nhiklhum gi, nungmoq chyáng htoq jé râ nghut lhê. ¹⁵ A ung htoq taî é Garai Gasang é chyunghuq é yanmai, jeju hkya-on hkyô gi, Yhâng chyáng ru nghut nyî sháng gaq ô!

10

Poluq, Yhâng É Hpungmû Lé Taî Hung É Hkyô

¹ Nungmoq eq myoqdong hkyûm nghut é hkûn gi, gyuq kyûm myit bo ri ga, wê gâng é hkûn gi, a gyuq a wâm dut ri ga kô é sù, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê. ² Shî mingkân é nyi yap a-tsang dông ngamoq asak dui ri ga myit ngam é byù ra-am lé, ngò a gyuq a wam é myit lé shit râ dâ tô lhê. Ngò jé lé é hkûn, nungmoq lé haû sù é myit a shit ra sháng gaq, ngò nungmoq lé dúng tôngbán kat lhê. ³ Hkâsu mù gâ le, ngamoq gi, mingkân shî má asak dui nyi kôhang mingkân byu pé kut é dông majan zân é a nghut. ⁴ Ngamoq majan zân é laknak gi, mingkân shi é laknak a nghut é za, shut shai é dông dang-rháng hkyô nghut é, gíngtîng é gyedap pé lé lhoq htên pyám râ matú Garaî é a-tsam byíng é laknak ru nghut lhê. ⁵ Ngamoq gi, dang-rháng rhâng lhûm é hkyô pé eq Garai Gasang lé sê é hkyô lé shut shaî shoq yhumsing gùng yhumsîng lhoq myhang mhaû é hkyô hkgangmó lé lhoq htên pyám mù, Hkrisduq é jìno gyo râ matú, myit sôn é hkyô hkat hkgangmó

lé shúm kut yu é nghut lhê. ⁶ Nungmoq é jìno gyo hkyô gi, gumjup é hkûn, jìno a gyô é hkyô hkgang mó lé ngamoq dam byi râ ri rì dut râ nghut lhê.

⁷ Nungmoq gi, ahtoq pyâm lé za wú nyi é bang nghut akô. Rayuq yuq gi, Hkrisduq eq sêng é sù hkyak nghut lhê ga myit lum tô é nghut jáng, ngamoq le, yhang eq rajung za, Hkrisduq eq sêng é bang nghut é lé, yhang dum bûn sê nyi sháng gaq. ⁸ Hkâsu mù gâ le, nungmoq lé lêng hkyô râ nó gi, nungmoq lé kô myhâng nhâng râ matú, ngamoq lé haû Yhumsîng byî é ahko ahkáng lé gyai gumrong le lhang, ngò gi, hoq hpû é hui râ a nghut. ⁹ Ngò gi, ngá é laiká pé èq nungmoq lé kyuq é su a dut nhâng nau é nghut lhê. ¹⁰ Hkâsu mù gâ le, ra-am gi, "Yhâng é laiká pé gi, gâng bo é eq wum-o bo é nghut ri; nghut kôlhang, yhanggùng gi, byuwup a bo é nghut mù, yhang taî é dang pé gi, haî a nghut." ga taî akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nghut é hkyô eq, rahá nghut nyi é hkûn, ngamoq zui saî râ nghut é hkyô lé, haû sù é bang sê gyo râ dut lhê.

¹² Ngamoq gi, haû yhumsing gùng yhumsîng owaq é bâng é hpúng má bo lom é hkyô nghut nghut, yhangmoq eq whuî é hkyô nghut nghut, a wám kut é nghut lhê. Yhangmoq gi, yhangmoq gùng yhangmoq chîn lhûm wú é eq yhangmoq gùng yhangmoq whuî lhûm wú kô é hkûn, hpaqchyî a bo é bang dut bekô nghut ri. ¹³ Nghut kôlhang, ngamoq gi, âng é mai lai shoq gumrông râ a nghut é za, ngamoq lé Garai Gasang masat to byî é, nungmoq chyáng lhang hkyit jé shoq nghut é maukyo hkaû má za gumrông râ nghut lhê.

14 Ngamoq gi, nungmoq chyáng a jé lé wú é dông mai, gyai yhang gumrong nyì râ a nghut; hkâsu mù gâ le, ngamoq gi, Hkrisduq é gabú danglù chùng mù, nungmoq chyáng lhang lé jé bê nghut lhê. 15 Dum, ngamoq gi, góbang kut é muzó lé le, âng é mai lai luí gumrong lhai é a nghut. Ngamoq myoqbyu é hkyô gi, nungmoq é lumjìng myit kô myhang jat nyì jáng sheq, nungmoq chyáng ngamoq zui saí é jowò gyai wó lhoq lâm râ nghut lhê. 16 Haû gi, nungmoq é mau lhang lai shoq, gabú danglù lé ngamoq wó hko kyo râ matú nghut lhê. Hkâsu mù gâ le, ngamoq gi, góyuq èq zui saí to bê loqzó eq séng luí, gumrông nau é a nghut. 17 Nghut kôlhang, "Gumrong é sù gi, haû Yhumsìng má gumrông sháng gaq." ✧ ga kê tô ri. 18 Hkâsu mù gâ le, yhumsìng gùng yhumsìng owaq é sù gi, hap yù huí é a nghut é za, haû Yhumsìng èq owaq byí é sù sheq, hap yù huí é ru nghut lhê.

11

Lagyo Apyoq Pé Eq Poluq

1 Ngò gi, ngá é ratsuí ngok é dang lé, nungmoq jân pyám byì râ lé myoqbyu é nghut lhê; gè gè yhang, nungmoq gi, haû su kut nyì gù nghut bekô. 2 Haî mù gâ le, ngò gi, Garai Gasang mai nungmoq lé magum é myit èq, nungmoq é matú magùm byì lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wó shit sháng gaq nghû, Hkrisduq nghut é yhumsìng hpô chyáng za nungmoq lé byì zo râ nghû, danggidiq byì to bê nghut lhê. 3 Nghut kôlhang, Ewaq gi, lhangmùi

✧ 10:17 Yer 9:24

hpaqchyî dâ é èq mhaú zô é huî é su, nungmoq myit é hkyô pé gi, Hkrisduq chyáng nungmoq é lhumzuî é eq sansêng é i-myit ap nóng é hkyô mai shuí ngoq ló byuq é hui râ lé, ngò myit chiq ri. ⁴ Hkâsu mù gâ le, rayuq yuq gi, nungmoq chyáng lé jé mù, ngamoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haú lé lui lui za lhom hap yu é dut bekô nghut ri. ⁵ Nghut kôlhang, ngò gi, "Ahkyak-lagyô pé" ga bâng é htoq má ratsuí lhang gyamgyi gyó sủ a nghut nghũ myit ngam é nghut lhê. ⁶ Ngò gi, dang tái hpaqchyî kung sủ rayuq a nghut kôlhang, sumsé hpaqchyî bò sủ nghut lhê. Ngamoq gi, hkyô hkanmó má, nungmoq lé haú hkyô hkyâng shoq sé nhâng bê nghut lhê.

⁷ Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq râ matú, ngá gùng ngò lhoq nyhum é gi, ngá é mara dut byuq bê lhu? ⁸ Ngò, nungmoq lé dojaú râ matú, gotû noqkuq hpûng pé mai htuqbâng é lé hap yu é gi, haú bâng chyáng mai ngò zik lú yu é đông dut bê nghut lhê. ⁹ Ngò gi, nungmoq eq rahá nyi mù, rajung jung râ é hkûn, ó yuq lé le wòlai a dut nhang é nghut lhê; hkâsu mù gâ le, Makedoni mau mai lé jé é gumang wui gi, ngò haí râ é lé htuqbang byi kô é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wòlai a dut nhâng shoq kut bê nghut mù, xoq lui le haú đông kut nyi râ nghut lhê. ¹⁰ Haú

Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mâ é bang ó yuq lháng, ngò haû su gumrong é hkyô lé wó hkûm zìng râ a nghut. ¹¹ Haî mù lú? Ngò, nungmoq lé a chyitdap é yanmai nghut lhê lú? Ngò, nungmoq lé chyitdap é hkyô lé, Garai Gasang sê lhê. ¹² Ngò gi, yhangmoq zui saî é lé gumrong é hkyô pé má ngamoq eq rawuí za són byi râ ahko ahkáng ô nau é bang lé ahkáng a byi râ matú, ngò kut nyi é su xoq luí kut shi râ nghut lhê.

¹³ Hkâsu mù gâ le, haû sù é bang gi, lagyo apyoq pé, mhaú zô é mù zui bang, Hkrisduq é lagyô pé đông kut mhaú é bang nghut akô. ¹⁴ Haû gi, maú ra hkyô a joq, hkâsu mù gâ le, Tsadán lháng gi, maubó é maumang lagyo rayuq đông kut mhaú é sù nghut lhê. ¹⁵ Haû mù, Tsadán é dui-nhâng zoshâng wuì gi, dingmán hkyo é dui-nhâng zoshâng wuì đông kut mhaú é nghut jáng, maú dân râ hkyô a joq é nghut lhê. Yhangmoq é ló htâng má gi, yhangmoq kut é eq rajung za hui zo kó râ nghut lhê.

Yhâng É Wuîhke Jamjau Hkyô Eq Séng Luí, Poluq Gumrong É Hkyô

¹⁶ Ngò puq taí kôlé, ó yuq le, ngo lé byù gò đông a sôn yù kó sháng gaq. Nghut kôlhang, nungmoq sôn yu é nghut jáng, ngò ratsuí wó gumrông sháng gaq, byù gò lé nungmoq hap yu é su, ngo lé hap yù kó laq. ¹⁷ Ngò, haû su gumrong é hkyô gi, haû Yhumsîng o é đông ngò taí nyi é a nghut, byù gò rayuq đông taí nyi é ru nghut lhê. ¹⁸ Byù myo myo gi, mingkân é hkyô đông gumrong nyi bum lhê nghut mù, ngò le gumrông râ nghut lhê. ¹⁹ Nungmoq gi, hpaqchyí lûm bo kô é nghut mù,

byù go pé lé gabú myit èq jân nyi akô nhung! ²⁰ Gè gè yhang, nungmoq gi, nungmoq lé jùn kut é sù lé le, nungmoq lé rhoi zô é sù lé le, nungmoq chyáng akyû hô zô yu é sù lé le, yhang gûng yhang owaq é sù lé le, nungmoq lé bo-pyuq pyuq é sù lé le, jân nyi akô nghut ri. ²¹ Ngamoq gi, nungmoq lé haù hkyô kut râ má wum gyai nyhôm lhê nghû yín yû râ lé, ngò, hoq ri!

Rayuq yuq, haì lé wám gumrong é nghut jáng, ngò le, haù lé wám gumrong lhê nghû, byù gò rayuq dông ngò taì nyi é nghut lhê. ²² Yhangmoq gi, Hebre byu pé nghut akô lhú? Ngò le nghut lhê. Yhangmoq gi, Israelaq byu pé nghut akô lhú? Ngò le nghut lhê. Yhangmoq gi, Abraham é awut ashîn pé nghut akô lhú? Ngò le nghut lhê. ²³ Yhangmoq gi, Hkrisduq é dui-nhâng zoshâng wuì nghut akô lhú? (Ngò gi, myit a gyîng é sù dông haù su taì é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huì wú bê, shî râ î é adàm dàm huì wú bê nghut lhê. ²⁴ Ngò gi, Yudaq byu pé nuichum èq bat é myi xê dàm byíng râ radàm ra ra dut é, ngo lêng hui zô wú é nghut lhê. ²⁵ Ngò gi, dumbáng èq nhuq huì é sum dàm, shî sháng gaq ga luqgok èq dú huì é radàm, wuì-sanghpo byoq huì é sum dàm, wuimau má myû byôm é ra-nyí ra-myìn hui zô wú bê nghut lhê. ²⁶ Ngò gi, xoq xoq hkyowuì htoq e ló é hkûn, wuì gû é gyuq chiq jung, damyaq huì é gyuq chiq jung, ngá é amyû wuì chyáng mâ é gyuq chiq jung, tûngbaù pê chyáng mâ é gyuq chiq jung, myuq hkaù pé mâ é gyuq chiq jung, yoso pé mâ é gyuq chiq jung, wuimau mâ é gyuq chiq jung eq

gumang apyoq pê chyáng mâ é gyuq chiq jung pé hui zô wú bê nghut lhê. ²⁷ Ngò gi, mù lé zuí nguí zuí hkyik mù, anum num a myang yhup shoq dut wú bê nghut lhê. Ngò gi, zòmút wuì shit huì é eq zoshuq a wó é anum num huì lai lo wú bê nghut lhê. Ngò gi, gyoq hpû é eq gùngchîn dut é huì wú bê nghut lhê. ²⁸ Haú pé lhunglhâng htoq má, noqkuq hpûng pé banshoq é matú ngò myit chiq byi é hkyô gi, nyí wuì ngò má wòlai dut nyi ri. ²⁹ Rayuq yuq wum nyhóm le, ngò le wum a nyhóm râ lhú? Rayuq yuq mara shuí kut shut é hui le, ngò myit a nyé râ lhú?

³⁰ Ngò gumrông râ dut é nghut le gi, ngò wum nyhóm é hkyô lé tân shit é pé lé gumrông râ nghut lhê. ³¹ Ngò a mhaû nyi é hkyô lé pyat dedu hkya-on huì é sù, haû Yhumsîng Yesuq é Îwa eq Garai Gasang sê lhê. ³² Damaskuq myuq má, Hkohlâm Areta é a-ô mâ é mauzau gi, ngo lé chyup râ matú, myuq lé zúng nhang é nghut lhê. ³³ Nghut kôlhang, ngò gi, manghkoq má lúng mù, myuq xêwâm mâ é hkohot dong mai lhoq hkyô kat é hui luì, yhâng é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rû gumrông nyi râ za nghut lhê. Akyû wó râ a nghut kôlhang, haû Yhumsîng chyáng mai lo é myoqwup shing-rán pé eq hpông shit é shing-rán pé lé gumrông râ nghut lhê. ² Ngò gi, lai lò bê raxe myi zân hkûn, mauhkûng sum tsáng ngu é

má shuî toq yu huî é, Hkrisduq mâ é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kôlhang, Garai Gasang gi, sê lhê. ³ Yhang hparadisu má shuî toq yù huî é gi, ngò sê lhê. Yhang gi, gungdu eq nghut lhê luq, a nghut é luq, ngò a sé, nghut kôlhang, Garai Gasang gi, sê lhê. ⁴ Yhang gi, byu pé taî kyô htoq râ ahkáng a wó é hkyô pé nghut é, a wó taî sân kyô é hkyô pé lé wó gyô ri. ⁵ Ngò gi, haú yuq sù é byu é hkyô eq séng luî gumrông râ nghut lhê; nghut kôlhang, ngò gi, ngá é wum nyhóm hkyô eq séng luî, gumrong é mai lai luî, ngá gûng ngò gumrông râ a nghut. ⁶ Ngò gi, gumrông hkyô lé hkyin yù râ dut é nghut jáng lhang, byù gò dut râ a nghut, haî mù gâ le, ngò gi, tengmán hkyô taî nyî râ nghut lhê. Nghut kôlhang, ó yuq le, ngò kut é eq ngò taî é mai myit lum to kô é htoq má, ngo lé, je a myit lo ko sháng gaq nghû, ngò a gumrông kut pyâm nyî lhê.

⁷ Haû laklaí dik é dông ngo lé hpông shit é shing-rán mó pê é yanmai, ngò a nghutbûn byuq sháng gaq ga, ngo lé gunjang râ matú, Tsadán é lagyo nghut é zu lé, ngá é gungsho má kat byî to bê nghut ri. ⁸ Haû lé ngá chyáng mai yu pyâm byi râ matú, ngò, Yhumsîng lé sum dâm dúng tôngbán wú bê nghut lhê. ⁹ Nghut kôlhang, Yhang gi, "Ngá é jeju gi, náng é matú luq dun é nghut lhê; hkâsu mù gâ le, Ngá é a-tsam gi, wum nyhôm é hkyô má lhoq gumjup é hui ri." ga luî, ngo lé taî ri. Haû mù luî, Hkrisduq é a-tsam gi, ngò má wó joq nyî sháng gaq nghû, ngò gi, ngá é wum nyhôm é hkyô pé

* **12:2** Hkrisduq má é byù rayuq gâ é gi, Poluq yhanggùng yhang lé taî nyî é nghut lhê.

eq séng luí, gabú myit mai je riyhang gumrông râ nghut lhê. ¹⁰ Haû nghut mù luí, ngò gi, Hkrisduq é yanmai, wum nyhôm é hkyô pé má le, rhoi huí é hkyô pé má le, wuîhke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik dik nyi lhê. Hkâsu mù gâ le, ngò wum nyhôm é hkûn sheq, ngò wúm bo é nghut lhê.

Poluq Chiq Byi É Hkyô

¹¹ Ngò gi, ngá gûng ngò byù gò lhoq kut yû bê nghut ri, nghut kôlhang, haû gi, nungmoq kut nhang é nghut lhê. Ngò gi, nungmoq èq owaq é hui ang sù nghut lhê; hkâsu mù gâ le, ngò gi, haí a nghut kôlhang, "Ahkyak lagyo pé" ga bâng é htoq má ratsuí lháng gyamgyi gyó sù a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklaí kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hkâ-nhám le wòlai a dut é nhîng, nungmoq gi, hkâsu mù, gotû noqkuq hpûng pé htoq má gyamgyi gyó nyi akô lú? Ngò, haû hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhîng nghû râ dàm, lé kum râ rì rì nghut bê mù, nungmoq é matú wòlai gi, a dut râ nghut lhê. Haí mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dông nghut kôle, zo wuî gi, mó wui é matú sutzè hkong to byi râ dut é a nghut, mó wuî sheq, zô wuî é matú hkong to byi râ dut é nghut lhê. ¹⁵ Haû mù luí, ngò gi, gyai yhang gabú é myit mai, ngò wó é jung hkangmó lé

nungmoq é matú chung jài râ nghut mù, ngá gûng lé lhang chûng jài râ nghut lê. Ngò, nungmoq lé myô chyitdap é yanmai, nungmoq gi, ngo lé shaû chyitdap kó râ lú? ¹⁶ Ngò gi, nungmoq chyáng wòlai a dut é hkyô têng lê. Nghut kôlhang, ngò gi, hpaqchyî haq da sù dut mù, mhaû lhik é đông nungmoq lé chyup yû sù dut byuq bê ga nungmoq ra-am myit akô myhi-nhung! ¹⁷ Ngò gi, nungmoq chyáng nhang kat byî é byù đông, nungmoq chyáng amyat kut zô yù bê nghut lê lú? ¹⁸ Ngò gi, Tituq lé nungmoq chyáng lé râ matú wum taî tsuq mù, ngamoq é gumang lé, yhang eq rahá nhang kat bê nghut lê. Tituq gi, nungmoq chyáng amyat kut zô é nghut lê lú? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lê, a nghut kó lú?

¹⁹ Ngamoq gi, nungmoq hí má ngamoq gùng ngamoq taî hung yu nyi rì nghû, ahkuî jé shoq myit nyi akô lú? Ngamoq gi, Hkrisduq mâ é byu pé đông, Garai Gasâng hí má taî nyi é nghut lê. Chyitdap é gumang wuì ê, ngamoq kut é jung hkangmó gi, nungmoq é akyu matú chyat nghut lê. ²⁰ Hkâsu mù gâ le, ngo lé jé é hkûn, ngò, nungmoq lé dut nhâng nau é su, nungmoq a wó dut kó râ eq, nungmoq, ngo lé dut nhâng nau é su, ngò a wó dut râ lé, ngò myit gyuq ri. Ngò gi, mabyoq jishûm htoq é, manon é, nhik-ûn buq é, byù hpûng gam é, gansang é, lumu é, gyai nghutbûn é eq atau ahû dut é hkyô pé joq râ lé gyuq ri. ²¹ Ngò dum lé jé é hkûn, ngá é Garai Gasang gi, nungmoq é hí má ngo lé myit nyhûm nhâng mù, yhangmoq ô nau é myit châng é má shut

é dông nyi zô lhum nau é i-myt, gungsho zùm yap é yubak mara eq a sân-yúng é hkyô kut shut é mai myit a lhmng bang myo myô é yanmai, yón kuq é hui zo râ lé, ngò myit chiq ri.

13

Ló Htáng Má Sidiq Byi É Dang Pé

¹ Ahkuî, ngò, nungmoq chyáng lé kum râ gi, sum lhmng nghû râ dàm nghut lhê. Haû gi, "Mara hun é hkyô hkangmó lé, í yuq sum yuq saksé hkâm é eq lhoq teng ra râ nghut lhê."✧ ga kê tô é eq rajung za nghut lhê. ² Ngò gi, í lhmng nghû râ dàm nungmoq eq rahá nyi é hkûn, nungmoq lé sidiq byi gû bê nghut lhê. Ahkuî le, nungmoq eq wê gâng tô é u lé, dum taí kôlé, ngò dum jé lé é hkûn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo râ nghut lhê. ³ Haû gi, ngò dông mai Hkrisduq dang taí nyi é hkyô saksé shit râ lé, nungmoq dúng nyi kômù nghut lhê. Yhang gi, nungmoq é hkyô lé hkâsu kut shuí-û é hkyô má wum nyhôm é a nghut, nungmoq chyáng a-tsam mó shit sù sheq ru nghut ri. ⁴ Hkâsu mù gâ le, Yhang gi, wum nyhôm é má jén sat é hui bê nghut kôlhang, Garai Gasâng é a-tsâm èq dui nyi é gi, hkyak têng lhê. Haû eq rajung za, ngamoq gi, Yhang su wum nyhóm kôlhang, nungmoq lé dojaú râ matú, Garai Gasâng é a-tsâm èq, Yhang eq rahá dui nyi râ nghut lhê.

⁵ Nungmoq gi, lumjúng hkyô má nghut nyi lhê luq, yhumsing gùng yhumsing myí wú keq. Yhum-sing gùng yhumsing chyam wú keq. Nungmoq gi,

✧ **13:1** Tarâ Pun 19:15

chyam é má sôm byuq é za a nghut jáng, nungmoq chyáng Hkrisduq Yesuq lúng nyî bê hkyô lé sé kó râ nghut lhê. ⁶ Ngamoq gi, chyam é má a sôm é hkyô lé, nungmoq wó sé kó râ nghut lhê nghû, ngò hkyak lum tô lhê. ⁷ Ahkuî, ngamoq gi, nungmoq shut é hkyô haî a kut kó râ matú, Garai Gasâng chyáng kyûdung byi lhê. Haû gi, ngamoq chyâm hui luí wó lut é hkyô lé byu pé myàng kó râ matú a nghut é za, ngamoq sôm é su dut kôlhang, nungmoq ge é hkyô kut kó râ lé myàng râ matú nghut lhê. ⁸ Hkâsu mù gâ le, ngamoq gi, haû tengmán hkyô eq shaî é dông haî le a ge kut é za, tengmán hkyo é matú za kut râ dut é nghut lhê. ⁹ Ngamoq wum nyhóm kôlhang, nungmoq wúm bo é hkûn, ngamoq gabú é nghut lhê; ngamoq kyûdung é gi, nungmoq gumjup râ matú nghut lhê. ¹⁰ Ngò gi, wê gâng tô é hkûn, haû hkyô pé lé haî mù kê é gâ le, ngò jé lé é hkûn, ahkáng ayá lé ngò chung é má htân htân a kut râ matú nghut lhê. Ahkáng ayá haû gi, nungmoq lé lhoq htên pyám râ matú a nghut, nungmoq lé kô myhang lo nhâng râ matú, haû Yhumsing ngo lé byî é sheq ru nghut lhê.

Ló Htâng É Shi-kyám Dang

¹¹ Ló htáng má ngò taí nau é gi, gumang wuî ê, nguingón yuqyo nyî keq. Gumjup hkyô shut sô nyî keq, ngò dúng tôngbán é dang lé gyo keq, myit rahkat za dut nyî keq, nguingón shoq asak duì nyî keq. Haû hkûn, chyitdap hkyô eq nguingón hkyo é Garai Gasang gi, nungmoq eq rahá nyi nyî râ nghut lhê.

¹² Chyoiyúng é bopuq puq é èq, rayuq eq rayuq shi-kyâm lhum keq. ¹³ Sãn-yúng bang banshoq gi, nungmoq lé shi-kyâm kat akô.

¹⁴ Haû Yhumsîng Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zùm yap hkyô gi, nungmoq banshoq bâng chyáng ru joq nyî sháng gaq ô.

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee